

1 Tesalonaikadan

Kerek Mimo Tesalonaikadan Yaa Wongkoon

Kerek Kee Komo Dowad Wongkoon

Pool kuu Tesalonaika nande weng amun daandoone Yuudan yena arud wandeniwe, kombiri wene Berea kere Atens kere Korin aom nandoon (Kwamiwen 17-18 wedmime). Nandekore kerek kee Tesalonaikadan yaa wongkoon. Tesalonaikadan yoom aron dukmenmo doboroon kowe, wongkoon kuu: 1. Kibireb yeweb anam andiwendan yi niindem aom aromni ye wengiib, 2. God ye inamen yaambed meenme dobiri ye kiwaan ye wengiib, 3. Keresu ika minindo kumbed anam andiwendan duknaniib kuu komarewa keraniib ye wengiib kui. Tesalonaika kuu gapman korok korok yi siti, porovins Masedonia aom. Kerek korem Poolbed wongkoon yaa kuu kee ibduruk wongkoon yeman. Wongkoon ye weeb kuu AD 51 areb.

Korok Weng

1. Amun Kerundi Weng Ibduruk (1:1)
2. Tesalonaikadan Yi Dowad Eso Andi Ye Weng (1:2-10)
3. Pool Yoom Sailas Yoom Tesalonaika Aombed Apaso Deme Awiniwen Yaa Koromonendi Weng (*sapta 2-3*)
4. Godbed Kubendi Ye Kiwaan Ari Dobiri Ye Weng (4:1-5:22)
5. Yeenbon Weng (5:23-28)

1 ¹Pool yoom Sailas yoom Timoti yoom.

Ambe God yoom Yariman Yesu Keresu yoom yaa anam andiwendan Tesalonaika aom doriib, yiib yaa wongkuub kii.

Kabamoon kondoon ye mimyob dowakeniib yewenubmo dobiriyiib kuu yiib yaa bangkandok.

God Yaa Eso Andiwen

²Nub kuu yiiib korem ye dowad aron korem God yaa eso andenub, yiiib aningkoyiib kowe kurikuri kerimaub. ³Yiib anam andi yaambad God ye deme ambangkimaiwiib, yiiib mimyob dowaken yaambad deme yobdood awinimaiwiib, Yariman Yesu Keresu kuu kwananeen ande meedmiib yaambad kangdommo doberembirimaiwiib, kuu nub Ambe God ye arinambo arimbed meene dakmimaub.

⁴Godbed mimyob dowaken keendoon ye angkodmia, yiiib kuu yembed bindoon kuu nubkaadkeruwen, ⁵amborom kuu nubbed weng amun yiiib yaa daanduwen kuu wengmomban, aromkonoyiib Kingkin Karadmoyiib niindem aom ma karekmiyiibban kangdommo anam anduweniib daanduwen kowe. Nub kuu yiiib dowadbed yiiib yoom komarewa doburuwen kuu yiiibkaadkeriwen kui.

⁶Yiibbed nub yaayiib Yariman yaayiib kumun ingkiwen. Kwane, durud yewed yemoon yiiib yaa meneboon kumban, Kingkin Karadmombad kubi kondoon kumbed yiiib kuu weng amun angkodmende awiniwen. ⁷Kwanekob, Masedonia ambibkindaniib Akaiya ambibkindaniib, yi korem kuu yiiib anam andi areb kwane kamem ande kamiib kii. ⁸Yariman ye weng kuu yiiib yaambad demboon, Masedoniadaniib Akaiyadaniib yaamomban. Kowe, yiibbed God yaa anam andiwen kuu kunaya kunaya kuu yikaadkeriwen.

Kwanekob, nub kuu kuyaa kuu yi yaa weng ma dakmaubban, ⁹amborom kuu yiibbed nub yaa komarewa angkodmendiwen kuu yikareb nub yaa dakmiwen kowe. Kwane dakmiwen kuu yiibbed dudi kuruwak god yaa korondenib, wad doreen ye God anam yaa anam andekorib, ye deme awinenib ¹⁰God ye Mingki Ewen arimbed mananeen ande meedmiib. Kuku Yesu, Godbed bobnoon yirimbed nenkoonoonman kui. Ye kuu God ye arud darewoob mananeen yaa kuu, nub be burudande bindaneen.

Tesalonaika Aom Poolbed Deme Ambangkoon

2 ¹Angkodmia, yiiib yiiibkaad, nubbed yiiib yaa owod munuwen kuu idiib keroon. ²Anuk kuu Filipai aombad durud yewed nub yaa kondeniib damangkandiwen. Kumban yiiibkaad kui, yiiib yaa munuuwe, yena kuu nub yaa manmo anam keruwen kuned, Godbed awandoone ye weng amun yiiib yaa arudkonoyiib dakmuwen. ³Nubbed yiiib yaa amonombime ande dakmimaub kuu, amarakmi yaambadban o inamen arewa yaambadban o yiiib yaa birandi ye dowadban. ⁴Kumban, Godbed “Ee, ne weng amun awine dakmime.” ande yedmoonkob kwamunemo dakmimaub. Nub kuu karubbed kubime andi ye dowad kamokban, Godbed kubok andi ye dowad kamuub, yembed nub mimyob yaa darobe wedmimaan kowe. ⁵Yiibkaadkeriwen kuu

nub kuu yiyb yaa mene yiiwaningko kankoone birande barang maondime andi ye weng be minindo. Angkon, inamen amuniib dakmi kuranbed yiyb yaa barang yemoon bi ye dowad minindo. God kuu nubbed komo kamuwen kuu yekaad. ⁶Nub kuu yiybbed o karub yenambed kubendime anduwedban. ⁷Nub kuu Keresu ye apasodan kowe, komo nub yaa dowan kuu yiyb yaa kaamondanuuwe yiybbed awande kondaniib kuu yimin. Kumban nub kuu kwanindo, no yiyb yaa amukmo oonenduwen, dana mana mana awaanbed oonimaun areb. ⁸Nub kuu yiyb yaa mimyob dowaken darewoob keenduwen kowe, nub kubi darewoob yaambbed yiyb yaa God ye weng amun kedmengkandenub, angkon anam dabokne dabokne kamuwen, amborom kuu yiyb kuu nub mimyob dowaken darewoob keendidan keriwen kowe. ⁹Angkodmia, anamaa, yiybkaadkeriwen kuu aron doboob yobdood ambanguwen. Nub dobiri dowad amnoomiib awingyawiib od deme ambanguwen kuu, yiyb yaa ma kondime andi ye wengiibban kumbed yiyb yaa God ye weng amun dakmenub yiyb yoom doburuwen.

¹⁰Yiyb anam andiwendan kumaom doburuwen kuu, nub kuu karadmoyiib yorokmoyiib ambarakmiyiibban doburuwen kuu yiyb yoom God yoom wedmiwen. ¹¹Yiybkaadkeriwen, nubbed yiyb yaa kedmengkanduwen kuu awodkimbed ye dana meed yaa kedmengkandemoon areb kedmengkanduwen. ¹²Kube ongkandiyiib kangkudere amukniyiib kame Godbed kubaneen ye kiwaan yaambbed kamime ande dakmenabuwen. Ye kuu “Ne oonimbon aom minime, ne nambiri kandime.” ande yiyb yaa baandimaan ye God kii.

¹³Kwane, nub kuu God yaa eso andimo kamemburuwen, amborom kuu yiyb kuu God ye weng nub yaambbed wengambere kandiwen kuu, karub ye wengban, anam kuu God ye weng andiwen kowe. Anam, kukuu God ye weng kii. Kukuu yiyb anam andiwendan yiyb niindem aom kuu inamen amun ambangkandimaan kui.

¹⁴Angkodmia, Yudea aom God ye nimakarub Yesu yaa anam andiwendan yaa komo keroon areb kwane kuu yiyb yaa keroon. Yuudanbed anam andiwendan kuyaa doriib kuu yenbandenib durud yewed kondiwen areb kwane yiyb ambibkandanbed yiyb yaa kwaniwen. ¹⁵⁻¹⁶Yuudan keembed Yariman Yesuyiib profesidaniib yenbande nongkobeniib, nuwiib yenbande yenburiwen. Nubbed Yuudanban yaa dakmimaub kuu Godbed bobni yaa burudande bindaneen ye dowad dakmimaub. Kwane kumbed Yuudan kee kebengkandamiib kumbed nimakarub korem yaa manmo keriiwe, Godbed yi yaa dowakeniibban keroon. Kwamune kumbed yi ambarakmi kuu darewoob kere demboone God kuu norin wande yoon.

Pool Kuu Tesalonaikadan Wedmendande Kamoon

¹⁷Angkodmia, nub kuu yiyb yoom doburuwen kumbed nub kuu yiywiib yaambbed aron dukmenmo awingke benwiniwen. Nub benwiniwen

kumban, nub meeni inamen kuu yuib yaa angkimboroon. Kwane, nub meeni miin darewoob kumbed yuib wedmendande kamemburuwen, ¹⁸ amborom kuu nub dowaken kuu yuiwiib yaa menem ande kamuwen kowe. Pool ne kuu kwane kamembaraan kumban Setenbed nub kebenendoon.

¹⁹Yuib dowad yaambad nub kuu Yesu kwananeen andi darewoob kerenub kubi darewoob kerekoruwe, Yariman Yesu mananeen yaron ari kuu ye kerebiri arimbed nambiri kandanuub. ²⁰Anamaa, yuib kuu nub nambiri nub kubi kui.

Timoti Kuu Yi Wedmok Wonoon

3 ¹Nub kuu yuib yaa mimyob keendemburuwenkob nub niindem aom kuu yiminban keroon kowe, nub ayoobmo Atens aom doberem ande meenuwen ²kowe, nubbed Timoti, nub angkodmi, God ye deme karub Keresu ye weng amun dakmimaan ye karub kuu, yedmenuuwe ku monoon kuu yuib anam andi yaa kube ongkandene aromkono kondanded. ³Yuib yaa kwanoon ye dowad kuu dabab menebaneen kuu kombaraib anded. Yuibkaadkeriwen kuu yuiwiib nuwiib yaa dabab menebaneen.

⁴Anam kuu nub kuu yuib yoom doburuwen kuu yuiwa nuwa kuu yenbande durud yewed kondaniib ande daanduwen. Kuku anam kwanoon kuu yuibkaadkeriwen. ⁵Kwamunoon kumbed aron doboobban ari kuu ne niindem aom kuu yiminban keroon kowe, Timoti kuu yedmaane mene yuib anam andi kara yaa wedmok monoon. Nembed unaan kuu Setenbed yuiwiib yaa menene yuib anam andi kankubunaneene nub deme yuib dowad kuu idiibban keraneen ande meenaan.

Timoti Ye Ongkandi Weng Amun

⁶Kumban Timoti kuu kibireb kee, yuiwiib yaambad mene yuib anam andi kara amuniib mimyob dowaken kara amuniib ye weng nuwiib yaa kanmene daandoon. Nub yaa kangkon yedmendoon kuu nuwiib yuiwiib ibmo doburuwen yaron yaa kuu, yuib kuu amun doburuwen ande meenimaib. Kwane, nubbed yuib wedmendem ande meenendimaub, kwane man yuibbed nub yaa kangkon kwanimaib ande daandoon.

⁷Kwane kowe, angkodmia, nub kuu yenbandi ye dabab meneboon kumban nub kuu kubuwen, amborom kuu yuib kuu yuib anam andi kuu awiniwen kowe. ⁸Yuib kuu Yariman yaa aromkonomo doriib kowe, nub kuu anammo wadkeremoon areb keruwen. ⁹Nub kuu yuib dowad God yaa eso darewoob andimaub, amborom kuu nub kuu yuib dowadbed God ye indob arimbed kubi miin darewoob keruwen kowe.

¹⁰Amnoomiib awingyawiib nub kuu yuib dowad yobdoodmo kurikuri kamimaub kuu, yuib ika wedmendenub yuib anam andi dowad komo

komo yiiibkaadkerindo kuu kedmengkandem anduwed. ¹¹Kwane kowe, nub Ambe God yoom Yariman Yesu yoombes kiwaan ongmen dibko, yiwiiib yaa menem.

¹²Yarimanbed yiiib yaa mimyob dowaken ariyiiib dabokne ongmen doko, yiiib kuyaomiiwa nimakarub yena korem yaayiiwa derendarok. Nubbed yiiib yaa mimyob dowaken keendimaub areb yiiib yaa kwamunemo kerok. ¹³Kwane yembed yiiib niindem aom kuu aromkono kondok, Yariman Yesumbed ye karadmodan benmananeen yaron ari kuu, karadmo dobiri ye dowad nub Ambe God ye murubia ari arewayiiib ande dedmoniyiiiban kondok.

Godbed Yiiib Yaa Kubendaneen Ye Kiwaan Ari Dobirime

4 ¹Weng yeenbon kei, angkodmia, Godbed yiiib yaa kubendaneen ye kiwaan ari dobirime ye weng kuu kedmengkanduwen. Anamaa, yiiib kuu kwamunemo doriib. Kibikee Yariman Yesu yaningko yaambes nangkande yedmuub kuu inamen kee darewoob keroka kwane kamembirime, ²amborom kuu Yariman Yesu yaromkono yaambes komo kamime ande kedmengkanduwen kuu yiiibkaadkeriwen kowe.

³God ye dowaken kuu yiiibka ye yaa konime anded. Kowe, ye dowaken kuu nenem kamaib anded. ⁴Ye dowaken kuu yiiib mimim yiiib id ye inamen yaa kuu yiiibka ongme oone dobirime, karadmo amunmo dobiri ye kiwaan yaambes oone dobirime anded. ⁵Kwane, God yaa anam andindodanbed yi niindem aom nenem inamen meenimaib kwane kamaib. ⁶Kuye inamen yedmuub kuu yiiib kuristen angkodmi maa yaa ambarakmaib, angkon ye yaa bironaib. God ye dowaken kukui. Karub kanembed kwane ambarakmaneen kuu Yarimanbed ukum konaneen kowe. Yiiib kuu anukbed yedmenduwen kui.

⁷Godbed nub yaa baandon kuu ambarakmi ye dowadban, karadmo dobirime anded. ⁸Kwane kowe, karub kanembed kuye weng wunekaraneen kuu, karub yaamban, ye Kingkin Karadmo yiiib yaa kondoon ye God yaa wunekaraneen kii.

⁹Kuristen angkodmia yaa mimyob dowaken keenoon mimyob dowaken keenoon kamime andi ye dowad kerek wongke keendaubban, amborom kuu Godbed kedmengkandoone yiiibkaadkeriwen kowe. ¹⁰Anamaa, yiiib kuristen angkodmia korem Masedonia ambibkin aom doriib kuu yiiibbed mimyob dowaken keendimaib. Kuned nub dowaken kee andemenduub kuu kuye inamen kuu darewoob kerok.

¹¹Kwane, nubbed anuk kwane daanduwen areb kuu, iwari dobiri ye inameniib keane kwane kamiyiiiban ye inameniib yiiib dingkimbed deme ambangki ye inameniib awinime. ¹²Kwamune kamaniib kumbed kane kane anam andindodan kuu wedmendekorib, nimaya karuwa amun andaniiwe yiiib kuu karub yena yaambes angkumone dobaraibban.

Anam Andiwendan Dukniwen Yaa Komo Keraneen?

¹³Angkodmia, yuib kuu dukniwendan yaa komo keraneen kuu yuibkaadban areb keru kuu nub dowakenban. Nimakarub yenambed bobni yiri kuu ika dembaubban ande dakmenib kwane mimyob wandemberenib yuudimaib areb kwane keraib anduwed. ¹⁴Nub anam anduub kuu Yesu kuu bobnekore ika demboon. Kowe nubbed anam anduub kuu kane kanembed Yesu yaa anam ande dukniwendan kuu Godbed Yesu yoom bindaneen.

¹⁵Nubbed kibirebya Yariman ye weng yembed dakmoon kuu ke dakmuub kei. Kane kane wad doruub kuu Yesu mananeen yaron ari kuu nubdin dukniwendan yi yoman be wanaanban. ¹⁶Kedi, Yariman yekareb Ewen arimbed mananeen kuu naawonmo baandiyuib engyus yi korok darewoob ye baandiyuib God ye kibi baandiyuib kamananeene, Keresu yaa anam ande dukniwendan kuu dembaniiwe yidin baneen. ¹⁷Kwananeene, yuiwa nuwa wad doruubdan kuu be daananeene wuib aom wedyambed Yariman awene mimyamo keranuub. Kwane, nub kuu Yariman yoom aron korem dobaranuub. ¹⁸Kwane kowe, weng kee man kube ongakane man kube ongakane kamime.

Yesu Mananeen Yaron

5 ¹Angkodmia, nub kuu aron komo arimbed kwananeen kuu wongke keendaubban, ²amborom kuu yuibkaadkeriwen kui, yid ye karub amnoombed menemoon areb kuu, Yariman kangkon yi koron yaron arimbed mananeen. ³Nimakarub kuu yewenub amun doruub kii andaniib yaron ari kuu kudmeniibban monmari aron keranuun. Kukuu wonong oyoomiibbed kudmeniibban odibin wimaan yaron areb keranuun kowe, yi kuu kirokmonaibban.

⁴Kumban, yuib kuu kumun aom dorokban kowe, kuyaron kuu yid ye karub minimaan areb keraneen kuu yuib binangki yemanban. ⁵Yuib korem kuu nambiriyuib awingyawiib ye dana meed, nub kuu amnoom kumun ye dana meedban. ⁶Kwane kowe, nub kuu yena unuk dangiwen areb keraub. Kuned nubkareb keenombere kangkadmam. ⁷Kedi, kane kane unuk angkimaib kuu amnoombed dangimaib, kane kane awarak ok animaib kuu amnoombed animaib.

⁸Kumban nub kuu awingyabdan kowe, nubkareb kangkadmam, kwane anam andiyuib mimyob dowaken keendiyuib kuu yirim areb derenem, kwane amaan ari nub kuu Godbed bobni yaa kuu burudande bindaneen andi ye meeni kuu ana nangmidan yi topi kamkono areb derenem. ⁹Amborom kuu Godbed nub kingkoon kuu ye arud darewoob kandi yemanban, nub Yariman Yesu Keresu yaambad bobni yaa kuu burudande bindaneen ye dowad kingkoon kowe. ¹⁰Yembed nub dowad bobnoon

kuu wad doruub o duknanuub kuu, nub korem kuu ye yoom dobaranuub anded. ¹¹Kwanekob, yii bkareb man kube ongakane man kube ongakane kame aromnime, kibirebya kamiib kwane kamime.

Inamen Yorokmo Awine Dobirime

¹²Angkodmia, nubbed yii b yaa yedmuub kuu, kane kanembed Yariman yaa anam ande dobiri ye dowad kuu yii b yaa oonendenib yii b yaa ongakandenib yii b kuyaom kuu deme darewoob ambangkimaib kuu, yi weng kuu wengamberenib yi dowad karub amun andime. ¹³Kowe, yi aningko kuu arimbed kankoonime, amborom kuu yi kuu deme kee awinimaib kowe. Kwane, iwari yewenub karamo neman neman kame dobirime.

¹⁴Angkodmia, nubbed kangkon ongakande yedmuub kuu ogoodmo doriibdan yaa kuu ongakandime. Undeek keriwendan yaa kuu aromni weng kube ongakandenib, wuud keriwendan kuu awandime. Nimakarub korem yaa yodbirimban iwarimbed dobiri kerekmen kamendime. ¹⁵Kwane, yenambed ambarakmendibka inande ambarakmendaib. Kane kanembed inande kwanandamibka kebendime. Kumban aron korem kuu man amun man amun kamime, nimakarub korem yaa kangkon amun amun kamenabime.

¹⁶Aron korem kuu kubimo dobirime. ¹⁷Kwane, kurikurimo kamembirime. ¹⁸Yiib yaa komo keroon ye dowad God yaa eso andime, amborom kuu kwamune kuu God ye dowaken Yesu Keresu yaambed kowoon, yii b yaa.

¹⁹Amot kumbemoon areb, Kingkin Karadmo kebenaib. ²⁰Kwane, Godbed ye profesidan yaa komo daandaneene dakmaniib yaa kuu arewa ande dakmaib. ²¹Kumban weng korem menebaneen kuu darobenib, amun kuu awinime. ²²Arewa korem yaa kuu kangkadmime.

²³Yewenub ye Godbed yekareb yii b niindem aom kumundin yaa karadmo kerundok. Kwane, Yariman Yesu Keresu mananeen yaron yaambed yii b idiib kingkiniib yaa arewayiib ande dedmoniyiibban kerok, kumundin amunmo kerundok. ²⁴Yiib yaa baandi ye God kuu ye weng kunduk awinimo kamimaan kowe kwananeen.

²⁵Angkodmia, nub dowad kurikuri kerime. ²⁶Kuristen angkodmia korem yaa karadmo kiwaanbed mandamuk konde kubendime. ²⁷Nembed yii b yaa Yariman ye arinambo arimbed yedmaan kuu, kerek kee kuristen angkodmia korem yaa kimingkime.

²⁸Nub Yariman Yesu Keresu ye kabamoonmo kondi ye mimyob dowaken kuu yii b yaa kerok.